

Exelentismo Ministro Obras Publika

Direitores no Chefe Departementos sira

Konfrensista sira nebe hau respeita,

Em permeiru lugar, hau hakarak utiliza oportunidade ida ne'e, hodi agradese komisaun organizadora tamba bele fo oportunidade ba hau hodi komvida hau partisipa iha enseramentu konferensia nacional ho tema "Dalan ba Atinjimentu Asesu ba Universal Bee, Seneamentu no Ijene iha Timor Leste 2030" ida ne'e.

Kuandu ita hare iha relatorio "Dezenvolvimento Agua Mundial" (*World Water Development Report*) 2018 hateten katak ; Nesesidade global ba Bee Mos sa'e mais ou menus um porsentu kada tinan durante dekada ikus ne'e nudar implikasaun husi kresimentu de populasaun, dezenvolvimentu ekonomia no mudansa padraun de konsumu, no sei iha mudansa signifikante nafatin iha futuru mai. Nesesidade industrial no nesesidade domestiku ba Bee Mos sei sae makas liu tan iha futuru mai.

Se itabo'ot sira akompanha media internacional konaba diskursus konaba Bee Mos nian, temi mos deklarasaun Secretario Geral ONU Dr. Antonio Guterres nian nebe hateten katak iha tinan 2050 nesesidade ba Bee Mos sei sa'e liu 40 %. Demanda ba Bee Mos projeta ona katak sei aumenta liu 40 porsentu. Secretario Geral Dr. Antonio Guterres mos hateten katak iha tempu neba *um quartu* da populasaun mundial nebe moris iha nasaun sira iha mundo sei hetan krize bee mos nebe

kroniku. Agora dadauk mundo hetan ona krize Bee Mos. De fakto $\frac{3}{4}$ husi 193 membros ONU nian fahe fonte de Bee Mos ba malu hanesan husi mota ou lagos ho nasaun vizinhos sira. No Ita bele foti eximplu di'ak ida katak total populasaun hamutuk triliun ida (1) husi Afganistan, Bangladesh, Bhutan, Nepal, Pakistao, tiongkok, no India uza lisuk Bee husi mota tolu iha parte nasaun hira ne'e nian. Nune Mos iha nasaun sira seluk nebe iha vizinho ba malu iha regiaun ida nebe ita hela ba.

Ita mos hare katak agora dadauk dezafiu boot tebes relasionadu ho Bee Mos iha mundo. Informasaun ONU nian no titulo "ONU no Bee (The UN and Water) hateten katak ;

- **2.1 Bilhoens** pessoas laiha acesso ba servisu Bee Mos nebe seguru (WHO/UNICEF 2017),
- **4,5 bilhoes** de pessoas laiha saneamentu nebe jere ho seguru (WHO UNICEF 2017),
- **90 porsentu** dezastre naturais hotu relasionadu ho Bee Mos (UNISDR).

Hare dezafiu ba nesesidade Bee Mos iha mundo nebe kada tinan sae makas hanesan dados sira nebe Nasoen Unidas fo sai maka iha Julho 2010 rekunhesemento ba Assembleia Geral das Nacoes Unidas Direitu Humanos ba Bee no Saneamento. Assembleia ida ne'e rekunhese liu tan katak ; direito husi ser humano mak tenke asesu ba Bee Mos nebe suficiente ba uza pesoal no familia nian ho 50 no 100 litrus por pesoa no por dia nebe ho kondisaun seguru.

Ne'e atu dehan de'it katak, Bee Mos no saneamento agora sai konsentrasaun husi nasaun barak inklui organizasaun mundial especialmente organizasaun nebe konsentra iha area saude no agricultura. Tamba ne'e mak pais sira iha mundu mos la ses husi seitor Bee Mos hodi prepara no responde nesesidade Bee Mos no saneamento ba ninia populasaun sira.

Exelensia sira,

Plano Estrategico ba Desemvolvimento Nacional nebe trasa husi governo iha 2011 hateten ona katak ate 2030 povo Timor Leste hotu sei asesu ona ba Bee mos nebe seguru.

Desemvolvimento rekursus Bee Mos nudar elemento importante ba kresimento ekonomiku sustentavel no melhoria saude subsistencia ba ema sira nian. Iha Timor-Leste, prioridade desenvolvimento rekursus Bee Mos mak tuir mai ne'e ; asesu ba servisu Bee Mos no saneamento nebe seguru ba familia sira iha area urbano no mos rural, asegura disponibilidade Bee Mos ho kuantidade no kualidade sufisiente hodi garante desenvolvimento ekonomiku iha area irrigasaun, industria no bisnis. Halo mos protesaun ba populasaun, infraestrutura no setor produtivo sira seluk nebe ameadado husi desastre ruma nebe akontese.

Iha relatorio Grupo Banco Mudial nian ho topiku "Asesmentu no Mapamentu Seitor Bee Mos iha Timor-Leste (*Water Sector Assessment and Roadmap*)", 2018

hatudu data kapas tebes ba ita hodi dudu dezenvolvimento bee iha ita nia rai. Relatorio ida ne'e hateten katak ; Timor Leste iha rekursus Bee Mos nebe adekuados nebe bele desenvolve hodi fornese ba populasaun tomak maibe ita sei sofre no falta hela infraestrutura nebe adequado, institusaun gestaun nebe adekuaudu mos. Ho precipitasaun media longo prazo de 1.500 milimetrus kada tinan, ho precipitasaun annual total longo prazo ho volume total iha Timor-Leste estimada hamutuk 22.300 miloens de metrus-kubikus (m³) tinan ida. Dadus hatudu katak rekursus Bee Mos renovaveis hetan 8.215 milimetrus kubikus (mm³) kada tinan ida ou 6,932 milimetrus kubikus (mm³) kada tinan.

Timor-Leste klasifikado iha nivel 63 husi 179 paises em termos de disponibilidade de rekursus renovaveis Bee Mos per kapita, pozisaun Timor-Leste ne'e hatudu katak ita iha okos liu (mais baixa) duke nasaun sira hanesan Indonesia, Myanmar, no Laos nebe por exemplu iha 7.389, 21.671 no 49.030 metros kubiku respektivamente kada anu no kada habitante.

Plano Estrategico Desenvolvimento Nacional hakerek ho dadus Censos, de 2010, hateten katak 57% da populasaun rural iha Timor-Leste acesso ona ba Bee Mos e mesmo 20% deit mak accessu ba kondisaun saneamento basiko. Tuir ita nia objektivos too 2020, bazeia ba Objektivos de Desenvolvimento Milénio mak too 2020 ita sei hetan :

- 1). 75% população rural iha Timor-Leste hetan ona acesso ba Bee Mos.

2). 40% comunidades rurais melhorias significativas ba instalasaun de saneamento.

Para hetan metas ida ne'e, ita tenke toma medidas sira hanesan ; propostas no Programa Abastementu agua iha area rural no Saneamentu ; Instalasaun de cerca de 400 sistemas ba Bee Mos, ba 25 mil familias rurais proximos tinan lima nia laran (uma média de 80 sistemas por ano), Construsaun ba sintiha (*latrinas*) komunitarias, disponibilizasaun de conhecimentos teknikus no supervisaun para comunidades, rekrutamentu ba 80 fasilitadores iha área ba Bee no saneamentu, iha sub-distritos sira, hodi apoio suco sira. Ita mos tenke tau matan ona para halo investementu no alargamentu ba sistema de irrigasaun inklui mos hadi'a liu tan armazenamento ba Bee Mos iha area rurais. Ministerio sira nebe iha governo hanesan Ministerio Obras Publiku, Agricultura, Saude tenke halo ona estudus conjunto ida konaba oinsa bele realiza lalais iha tinan hiran ne'e atu responde ba nesesidade povo nian iha area Bee Mos.

Exelensia sira,

Problema Timor-Leste nia agora dadauk boot tebes inklui oinsa governo bele esforso makas hodi fornese bee mos nebe seguru ba populasaun Timor Leste tomak. Tamba ne'e mak hau hakarak hato'o parabens ba Ministerio Obras Publika especialmente Ministerio Obras Publika dirasaun Nacional Agua no Saenamentu no Ministerio Saude.

Timor Leste oficialmente lansa ona Plano Mestre ida ba Bee no Saneamento Municipio ha (4) nian hanesan Baucau, Lospalos, Vikeke, no Manufahi. Lansamento plamo mestre ne halo iha Dili dia 22 Marsu 2016 iha selebrasaun loron mudial ba Bee Mos nian. Tamba ne'e implementasaun ba plano mestre ida ne'e importante tebes hodi responde ba nesidade ba Bee Mos no Saneamento nebe urgente tebes ba povo Timor Leste tomak tantu iha area Urbano no Mos area rural.

Ita hatudu tiha ona ba ita nia povo, oinsa mak estadu ou Governu fornese eletricidade ba sira iha IV Governo Constitucional. Agora ita hotu esforso-an hodi resolve asunto Bee Mos nebe populaasaun sira infrenta mais integrado. Estudus no programa balun Ministerio Agricultura halo ona liu-liu konaba Irrigasaun no mos estudus konaba kriaasaun Barazem iha Parte Laleia Manatuto, Viqueque no Ermera. Plano ida ne'e persija konstrui lalais hodi rejolve nesidade Bee Mos aumesmo tempo rejolave Bee ba Agrikultur sira.

Hanesan ita hotu hatene katak Bee Mos, saneamento no ijene hanesan seitor importante nebe persija tau matan husi ema hotu liu-liu governo. Inisiativa atu organiza seminario ida ne'e importante tebes tamba topiku nebe ita organiza relevansia no tur duni realidade pais nian. Espera que husi konferensia ida ne'e hamosu rejultadu konkretas hodi luta hamutuk ba forneseamento Bee Mos no Saneamento ba populaasaun iha Timor Leste tomak.

Antes hau taka konferensia ida ne'e, la-haluha hau hato'o hau nia agradeseamento ba parseiru desenvolvimento sira tantu husi nasional hanesan Feto Engeneira, UNTL, Plataforma Nacional BESI Timor Leste, no mos husi Organizasaun Saude Mudial (WHO), husi Parseiru Desenvolvimento Humana husi Australia, Plan Internacional, UNICEF nebe servisu hamutuk hodi organiza konferensia ida ne'e.

Ho ida ne'e hau lori ita hotu nia naran deklara TAKA KONFERENSIA IDA NE'E.

OBRIGADO BARAK